



REPUBLIKA E SHQIPËRISË
AUTORITETI I KOMUNIKIMEVE ELEKTRONIKE DHE POSTARE
-Këshilli Drejtues-

V E N D I M

Nr.2586, datë 10.07.2015

Për

Shyrtimin e propozimit të inspektorëve për heqjen e së drejtës së ofrimit të shërbimeve të rrjeteve të komunikimeve elektronike sipërmarrësit IT-Tel 2005 sh.p.k.

Këshilli Drejtues (KD) i Autoritetit të Komunikimeve Elektronike dhe Postare (AKEP), i përbërë nga:

1. Z. Piro	Xhixho	Kryetar
2. Z. Alban	Karapici	Anëtar
3. Znj.Anila	Denaj	Anëtar
4. Znj.Ketrin	Topçiu	Anëtar
5. Znj.Klarina	Allushi	Anëtar

dhe sekretare Znj.Marsida Drushku, në mbledhjen e datës 10.07.2015, sipas procedurës së përcaktuar në ligjin nr. 9918 datë 19.05.2008 “Për Komunikimet Elektronike në Republikën e Shqipërisë”, i ndryshuar, ligjin nr. 8480, datë 27. 5.1999 “Për funksionimin e organeve kolegjiale të administratës shtetërore dhe enteve publike”, dhe Rregullores së Brendshme të AKEP, miratuar me Vendimin Nr.2506, datë 30.10.2014 të Këshillit Drejtues të AKEP, shqyrtoi çështjen me objekt:

Shqyrtimin e propozimit të inspektorëve për heqjen e së drejtës së ofrimit të shërbimeve të rrjeteve të komunikimeve elektronike sipërmarrësit IT-Tel 2005 sh.p.k.

BAZA LIGJORE:

1. Ligji nr. 9918, datë 19.5.2008 “Për Komunikimet Elektronike në Republikën e Shqipërisë” (ligji nr. 9918), i ndryshuar;
2. Ligji nr. 8485, datë 12.5.1999 “Kodi i Procedurave Administrative” (ligji nr. 8485), i ndryshuar;
3. Rregullore e AKEP nr. nr. 34, datë 23.12.2014 për “Inspektimin, monitorimin e spektrit të frekuencave dhe masat administrative”,

K Ë SHILLI DREJTUES:

Nga shqyrtimi i materialit shkresor, të përbërë nga:

1. Urdhër Inspektimi nr. 1049Prot., datë 15.5.2015, për inspektim të sipërmarrësit IT-Tel 2005 sh.p.k.;
2. Akti i Inspektimit nr. 12, datë 27.5.2015 (nr. 104/1Prot., datë 27.5.2015);
3. Relacion mbi inspektimin e kryer tek sipërmarrësi i komunikimeve elektronike IT-Tel 2005 sh.p.k.;
4. Korrespondenca me postë elektronike e shkëmbyer mes palëve;
5. Memo drejtuar Kryetarit, më datë 28.5.2015, për gatitur nga DMFCI “Mbi rezultatet e inspektimit”;
6. Shkresa nr. 1049/4Prot., datë 19.6.2015, për thirrje në seancë dëgjimore të IT-Tel 2005 sh.p.k.
7. Relacion shpjegues (Relacioni);

si dhe duke iu referuar diskutimeve në mbledhje mbi çështjen, dhe bazës ligjore të sipërcituar,

V Ë R E N:

I.

i. Me Urdhrin e Inspektimit nr. 1463, datë 15.5.2015, Kryetari ka udhëruar kryerjen e inspektimit në sipërmarrësin e komunikimeve elektronike IT-Tel 2005 sh.p.k., me objekt verifikimin e zbatimit të:

1. Kushteve të përcaktuara në Autorizimin e përgjithshëm lidhur me:
 - *Bashkëveprimin e shërbimeve dhe interkoneksionin e rrjeteve;*
 - *Sigurimin e disponueshmërisë dhe përdorimin e numrave nga plani i numeracionit për përdoruesit fundorë;*
 - *Mbrojtjen e të dhënave vetjake dhe të privatësisë;*
 - *Mbrojtjen e përdoruesve;*
 - *Respektimin e rasteve të kufizimeve në lidhje me përmbajtjen e paligjshme ose të dëmshme;*
 - *Lejimin e përgjimit nga autoritetet kompetente;*
 - *Ofrimin e rrjeteve të komunikimeve publike në rastet e gjendjes së emergjencës;*
 - *Detyrimi për të ofruar akses;*
 - *Mbrojtjen e rrjeteve të komunikimeve publike ndaj aksesit të paautorizuar;*
 - *Detyrimin për të plotësuar standardet dhe specifikimet teknike të rrjeteve dhe të pajisjeve për ndërtimin e rrjeteve dhe ofrimin e shërbimeve të komunikimeve elektronike si dhe të shërbimeve të faciliteteve shoqëruese;*
 - *Regjistrimin e pajtimtarëve, ruajtjen dhe administrimin e të dhënave për qëllime të ndjekjes penale, etj;*
2. Kushteve të përcaktuara në Autorizimin Individual për përdorimin e frekuencave;
3. Kushteve të përcaktuara në aktet normative të AKEP lidhur me:

- a. Publikimin e informacionit për tarifatat si dhe kushtet e aksesit dhe përdorimit të shërbimeve;
 - b. Kushteve të përgjithshme të kontratave tip me pajtimtarin.
4. Në zbatim të urdhrat të lartpërmendur, grupi i inspektimit ka njoftuar paraprakisht me telefon, dhe me anë të postës elektronike më datë 21.5.2015, përfaqësuesen e sipërmarrësit IT-Tel 2005 sh.p.k., të cilës i ka dërguar bashkëngjitur kopje të urdhrat. Gjithashtu, përfaqësueses i është kërkuar krijimi i kushteve për kryerjen e inspektimit, konform nenit 12, të Rregullores nr. 34, datë 23.12.2014 për “Inspektimin, monitorimin e spektrit të frekuencave dhe masat administrative” (këtu e më poshtë: *rregullore e inspektimit*).
- Përfaqësuesja e IT-Tel 2005 sh.p.k., nuk i është përgjigjur këtij emaili dhe as telefonatave të kryera nga inspektorët e AKEP. Për këtë arsye, Grupi i inspektimit, gjatë kryerjes së inspektimit nuk është shoqërua nga kjo përfaqësuese.
5. Inspektimi vijoi me verifikimin e zbatimit të detyrimeve të sipërmarrësit, dhe në përfundim të tij, duke patur parasysh dokumentacionin e dorëzuar në AKEP në zbatim të ligjit nr. 9918, i ndryshuar, si dhe të rregulloreve të nxjerra për zbatimin e tij nga AKEP, dhe inspektorët kanë konstatuar se:
1. Sipërmarrësi IT-Tel 2005 sh.p.k. sipas Autorizimit Nr. 2012-AP-U157-8-3, datë 13.4.2012, është regjistruar për të ofruar:
 - A. Rrjete publike të komunikimeve elektronike:
 - a. *Rrjete publike tokësore fikse aksesit dhe transmetimi*
 - B. Shërbimeve publike të komunikimeve elektronike:
 - b. *Aksesit internet*
 2. Grupi i inspektimit pas verifikimit, ka konstatuar se, sipërmarrësi IT-Tel 2005 sh.p.k.:
 - a. Me mospublikimin e informacionit të kërkuar në faqen zyrtare të internetit, sipërmarrësi nuk ka zbatuar kërkesat e Rregullores nr. 27, datë 21.9.2012 “Mbi publikimin e informacionit për tarifatat si dhe kushtet e aksesit dhe përdorimit të shërbimeve”. Për zbatimin e këtyre kërkesave sipërmarrësi It-Tel 2005 sh.p.k. është njoftuar disa herë nga strukturat përkatëse të AKEP (Sektori i Autorizimeve dhe Drejtoria e Mbikqyrjes së Tregjeve, Tarifave dhe Shërbimit Postar).
 - b. Për arsye të mosbashkëpunimit me inspektorët e AKEP, sipërmarrësi ka shkelur kërkesat e ligjit nr. 9918, i ndryshuar, dhe konkretisht nenin 132, pika 3, dhe Rregullores së inspektimit, që parashikon detyrimin për lejimin dhe bashkëpunimin e sipërmarrësit me inspektorët e AKEP.
 3. Për këto shkelje inspektorët, bazuar në nenin 135, pika 2, gërma b, të ligjit nr. 9918, datë 19.5.2008, i ndryshuar, dhe nenin 33, (nënpika 33.2, gërma d) mbi kundravajtjet

administrative, të Rregullores së inspektimit, kanë vendosur t'i propozojnë Këshillit Drejtues të AKEP, heqjen e së drejtës së ofrimit të shërbimeve të rrjeteve të komunikimeve elektronike, sipërmarrësit IT-Tel 2005 sh.p.k.

II.

Pas shqyrtimit të materialeve pjesë përbërëse të dosjes së inspektimit të sipërmarrësit IT-Tel 2005 sh.p.k., konstatimeve dhe konkluzioneve të arritura në përfundim të procesit të inspektimit, vlerëson se:

1. Grupi i inspektimit në zbatim të parashikimeve të Rregullores nr. 34, datë 23.12.2015, për inspektimin, monitorimin e spektrit të frekuencave dhe masat administrative” dhe konform këtyre kërkesave të rregullores, ka kryer veprimet proceduriale duke zhvilluar procedure inspektuese.
2. Rezulton se, Grupi i inspektimit ka njoftuar paraprakisht përfaqësuesin e sipërmarrësit IT-Tel 2005 sh.p.k., me telefon dhe postë elektronike më datë 21.5.2015, duke i dërguar bashkëngjitur kopjen e Urdhrit të Inspektimit nr. 1463Prot., datë 15.5.2015.
3. Përfaqësuesi i IT-Tel 2005 sh.p.k., rezulton të mos i jetë përgjigjur grupit të inspektimit dhe mos ketë bashkëpunuar me këta të fundit, në zbatim të detyrimit të parashikuar në nenin 132, pika 3 e ligjit nr. 9918, dhe Rregullores së inspektimit nr. 34, datë 23.12.2015, nenit 5 (pika 5.4) dhe nenit 10 për të drejtat, detyrimet dhe përgjegjësitë e sipërmarrëve gjatë inspektimit të veprimtarisë së tyre.
4. Sa i takon shkeljeve të tjera konstatuara nga inspektorët gjatë verifikimit, vërehet se, sipërmarrësi IT-Tel 2005 sh.p.k., edhe pse është njoftuar disa herë nga strukturat e posaçme të AKEP të ngarkuara për zbatimin e detyrimeve rregullatore, nuk ka zbatuar detyrimet që rrjedhin nga Rregullorja nr. 27, datë 21.9.2012 “Mbi publikimin e informacionit për tarifën si dhe kushtet e aksesit dhe përdorimit të shërbimeve“. Mospërbushja nga sipërmarrësi IT-Tel 2005 sh.p.k., e detyrimeve të rregullores nr. 27, përbën gjithashtu, shkelje të parashikimeve të ligjit nr. 9918, datë 19.5.2008, i ndryshuar, e konkretisht nenin 54, detyrimin mbi publikimin e tarifave për përdoruesit fundorë, dhe nenin 98, mbi transparencën dhe publikimin e informacionit.
5. Në njoftimet e kryera nga strukturat përgjegjëse të AKEP, rezulton se sipërmarrësit IT-Tel 2005 sh.p.k., i është lënë afat për përmbushjen e detyrimeve, mbi publikimin e të dhënave, afat i cili nuk është respektuar, duke çuar në mosplotësimin e detyrimit për dërgimin e të dhënave konform Rregullores së Autorizimit të Përgjithshëm dhe rregulloreve të tjera të lartpërmendura.
6. Për sa më lart parashtruam, duke patur parasysh, shkeljet e konstatuara, Këshillit Drejtues në zbatim të nenit 135, pika 4, të ligjit nr. 9918, datë 19.5.2008, i ndryshuar, vendosi t'i thërrasë në seancë dëgjimore sipërmarrësin IT-Tel 2005 sh.p.k., për t'i dhënë mundësi të japë shpjegime, përpara marrjes së vendimit nga Këshilli Drejtues.

7. Me shkresën nr. 1049/4Prot, datë 19.6.2015, të Këshillit Drejtues, sipërmarrësi IT-Tel 2005 sh.p.k. është njoftuar për mbajtjen e seancës dëgjimore më datë 24.6.2015, ora 11:30, në lidhje me përfundimet e aktit të inspektimit. Njoftimi i është dërguar sipërrrësit në adresën zyrtare e njoftuar në AKEP. Duke qenë se, shkresa u kthye nga zyra postare me shënimin “*larguar*”, njoftimi është nisur gjithashtu, në adresën e postës elektronike të deklaruar në regjistrin e sipërmarrësve, ku edhe nga kjo adresë njoftimi është kthyer i padërguar. Sipërmarrësit e komunikimeve elektronike dhe postare, për çdo ndryshim në të dhënat e paraqitura në AKEP kanë detyrimin e njoftimit.
8. Këshilli Drejtues, në përfundim të arsytimit, dhe për sa më lart u parashtrua, duke patur parasysh, shkeljet e konstatuara nga inspektorët, rrethanat në të cilat është zhvilluar veprimtaria inspektuese dhe verifikuese sipas objektit të Udhrit, në kushtet e mosbashkëpunimit të sipërmarrësit It-Tel 2005 sh.p.k., duke çuar në mospërmbushjen e detyrimeve edhe pas njoftimeve nga AKEP, dhe së fundi mosparaqitja në seancën dëgjimore të datës 24.6.2014, të njoftuar nga Këshilli Drejtues, pa shkak të arsyeshëm,

PËR KËTO ARSYE:

Bazuar në pikën 1 të nenit 114, në pikën 1 të nenit 115 dhe pikën 3 / b të nenit 135, të ligjit nr. 9918/2008 të ndryshuar, dhe në përputhje me Kodin e Procedurave Administrative, Këshilli Drejtues i AKEP,

V E N D O S:

1. Të miratojë propozimin e inspektorëve për heqjen e së drejtës së ofrimit të shërbimeve të rrjeteve të komunikimeve elektronike sipërmarrësit IT-Tel 2005 sh.p.k.
2. Të njoftohet sipërmarrësi IT-Tel 2005 sh.p.k. për zbatimin e këtij Vendimi;
3. Kundër këtij vendimi mund të bëhet ankim në Gjykatën e Tiranës, brenda 30 ditëve nga marrja e këtij vendimi.
4. Ky vendim të publikohet në faqen e internetit të AKEP: www.akep.al.

Ky Vendim hyn në fuqi në datën e miratimit të tij.

K R Y E T A R

Piro XHIXHO

ANËTARË:

1. **Alban KARAPICI**
2. **Anila DENAJ**
3. **Ketrin TOPÇIU**
4. **Klarina ALLUSHI**